

Ma tutu nunuu ña tãa racha'nu Paulu kuenda ñivi chìnuni tu'un Jesuu ña ìyo ñuu Tesalónica

*Nuu kàña'a Paulu chi'in ñivi chìnuni tu'un
Jesuu ìyo ñuu Tesalónica*

¹ Yu'u Paulu chi'in Silvanu ta Timoteu, tãa ndi tutu i'ya kuenda ndisaa ndyo'o ndian chìnuni tu'un Jesuu ìyo ma ñuu Tesalónica, vati ndyo'o kùu ndian ìyo kuenda Tatá yo Ndioo chi'in Racha'nu Jesucristu. Ta ma Tatá yo Ndioo chi'in ma Racha'nu Jesucristu, na ja'a ra ña na koo vii ma anima ndo ta na ku'va ra ma ñamani ra nuu ndo ndia.

*Ma ñivi ìyo ñuu Tesalónica ya'a ga chìnuni na
tu'un Jesuu*

² Nani ora ña kà'an ndi chi'in Ndioo ra kùu Tatá yo, juuni chà'a ndi ta'vindioo nuu ra cha'a' ndo, ³ vati ora kà'an ndi chi'in ra, juuni chàku'uni ndi ti ya'a ga jà'a ndo tiñu kuenda ra cha'a' ña ya'a chìnuni ndo tu'un ra. Ta juuni chàku'uni ndi naja kua kùta'an ndo chi'in ra ña kùuni ndo nde'e ndo ñivi ta'an ndo, ta naja kua ya'a ga kùndeeni ndo ña ndè'e ndo tundo'o, vati töve jàña ndo ña ndàtu ndo Racha'nu Jesucristu nda kati chaa ora ña ni kichi ndiko ra. ⁴ Ndyo'o yanì ndian chìnuni, cha chìto va'a ndi ti maa ma Ndioo kãchin ra ndo ña na kuu ndo ñivi ra, vati kùuni ra nde'e ra ndo. ⁵ Vati ora kãtitu'un ndi

ma tu'un va'a cha'a' Jesucristu nuu ndo, töve nī katitu'un ndi yi chi'in tu'un yu'uni ndi, vati juuni jāna'a ndi yi chi'in ndatu jā'a ma Tati Í Ndioo ndia. Ta juuni ch̀to va'a ndi ti tu'un ndicha k̀u yi, ta juuni cha ndē'e ndo ma naja kua chīyo ndi chi'in ndo niku, vati maaaa tiñu va'a jā'a ndi kuenda ndo ma kivi ikan.

⁶ Ndicha kuu ña ndyo'o indukuni va'a ìyo ndo, takua ìyo ndi, ta indukuni ìyo ndo takua ìyo ma Racha'nu ndia, ti indukuni tãndikun ndo kuà'an ndo chi'in ndi ma iti' ra, ta jā'a ndo takua jā'a ra ndia. Ta juuni jāchi'in va'a ndo ma tu'un ra ora kãtitu'un ndi yi nuu ndo. Ta ma Tati Í Ndioo jā'a yi ña ya'a ga ch̀sii ndo ora kīcha'a ndo ch̀nuni ndo ma tu'un Jesuu ña jāna'a ndi nuu ndo, vaji ndē'e ndo kua'a' tundo'o cha'a' ma tu'un ra. ⁷ Ta ma kua chīyo ndo ikan, jāna'a ndi'i yi, ta ndē'e tandi'i ma ndian ch̀nuni ìyo ñu'u' Macedonia ta ñu'u' Acaya ma takua va'a chīyo ndo. ⁸ Ta ndicha kuu ña ch̀takuati ma tu'un cha'a' Racha'nu Jesuu ta cha'a' naja kua ch̀nuni ndo tu'un Ndioo ninii ñuu ìyo ma ñu'u' Macedonia ta ñu'u' Acaya, va juuni ch̀takuati yi ndava kua'a' inga tuku ñuu ndia. Yakan va tūva ìyo yi ña katitu'un ndiko ndi nuu nī'iin na, kua ch̀nuni ndo tu'un ra, vati cha ch̀to va'a na naja kua k̀u yi. ⁹ Vati juuni maa ma ñivi ndisaa ñuu ikan kãtitu'un na nuu ndi naja kua tiñu'u ndo ndi ora chā'an ndi chānde'e ndi ndo, ta naja kua jā'a ndo ña ndākoo ndo ña jāka'nu ndo ma ndioo yutun íí, ta tãndikun ndo ma iti' ndicha ta kīcha'a ndo jāka'nu ndo Ndioo, vati uvanuu rakan k̀u ma Ndioo ndito ta ndaa. ¹⁰ Ta ma ñivi ñuu ikan juuni nãtu'un na chi'in

ndi ña ndicha kuu ña ndàtu ndo ma kivi ña ni kichi ndiko Jesuu iti' andivi, vati rakan kùu ra Se'e Ndioo, ra jānataku ndiko ra tañu ma ndian ndií. Ta juuni ma Jesuu ni jakakú ra yo nuu ma tundo'o ya'a ga xaan ña ni jande'e Ndioo ñivi tiá iti' nuu.

2

Ma tiñu jà'a Paulu ma ñuu Tesalónica

¹ Ndyo'o yani, cha chito va'a ndo ti ora kīchi nde'e ndi ndo, tüvi nī janaa kà'a ni ndi ma tiempu ndi chi'in ndo, vati kīchi jà'a ndi iin tiñu va'a kuenda ndo ndia. ² Ta juuni cha chito va'a ndo naja kua kānduva'a ma ñivi ñuu Filipu ndi, ta naja kua jānde'e na tundo'o ndi antea ña chāa ndi ñuu ndo. Va vaji takan jā'a na chi'in ndi, va tüvi nī yu'vi ndi ku'un ndi ma ñuu ndo ña kukatitu'un ndi nuu ndo tu'un cha'a' naja jākakú Jesuu yo, vati Ndioo tīndee ra ndi, vaji kāketa ndian kùuni kuati ndē'e nuu ndi. ³ Ta yūvi tu'un vata kùu ma ña jāna'a ndi nuu ndo ti maaa tu'un ndaa kùu yi, ta ni tüvi chānini ndi janda'viña'a ndi ndo ndia, ⁴ vati juuni maa ma Racha'nu Ndioo kūndeeni ra nuu ndi. Yakan va chā'a ra ma tiñu ikan nuu ndi ña na katitu'un ndi nuu ndo naja kua kùu kakú ndo, ta takan kātitu'un ndi yi nuu ndo vitin. Ta chi'in ma tu'un kātitu'un ndi, tüvi nānduku ndi ja'a ndi ña na kuta'ani ma ñivi yi, ti kuenda Ndioo kà'an ndi yi. Vati rakan kùu ma ra ña kī'in ku'va naja kua kàa ma anima yo. ⁵ Ta cha chito va'a ndo ti na tüvi jānda'viña'a ndi chi'in ma tu'un vii ña kà'an ndi ta ni tüvi nānduku ndi naja kua

jakanaa ndi xu'un' nuu ndo ndia. Ndioo ch̀to ña ndicha k̀u ma tu'un ña k̀an ndi nuu ndo i'ya. ⁶ Vati taku ndyu'u t̀vi ǹnduku ndi ña na jaka'nu ǹiin ñivi ndyu'u, ni ndyo'o ta ni ñivi inga tuku ñuu ndia. Vaji k̀u ndakan ndi nuu ndo ña na tindee ndo ndi chi'in ndisaa ma ña k̀mani nuu ndi, cha'a' ña ch̀a ma Racha'nu Cristu tiñu nuu ndi niku. Ta t̀vi ǹ ja'a ndi yi takan, ⁷ vati ya'a vii j̀a' ndi chi'in ndo, ti ndyu'u k̀uni ndi ndo takua k̀uni iin ña'a k̀u ma'á ora k̀mian ndiakuati se'an. ⁸ Takan k̀u ta ora k̀titu'un ndi tu'un va'a Ndioo nuu ndo, va na ỳvi yakani k̀u ma ña j̀a' ndi, vati ndava k̀u kuvi ndi cha'a' ndo cha'a' ña ya'a ga k̀uni ndi nde'e ndi ndo. ⁹ Yakan va ndyo'o yani, cha ch̀to va'a ndo naja kua ni'i j̀tiñu ndi nduvi ta niñuu, ikan na ni'i ndi ña kachi ndi ora ch̀yo ndi chi'in ndo ma ora ch̀kunuu ndi k̀titu'un ndio ndi ma tu'un Ndioo nuu ndo. Takan j̀a' ndi, vati t̀vi k̀uni ndi kuu ndi iin ndian j̀atñu nuu ǹiin ndo.

¹⁰ Ta ndyo'o cha ch̀to ndo ta ch̀to va'a Ndioo ndia, naja kua va'a ta ndaa ña j̀a' ndi ora ch̀yo ndi chi'in ndisaa ndyo'o ndian ch̀nuni tu'un Ndioo. Yakan va ǹiin ñivi na k̀u tisokuati na ndi. ¹¹ Ta juuni cha ch̀to ndo ña naja kua j̀ndomani ndi ta'ii'in ndo ta naja kua k̀chi sii k̀uni ndo ora t̀so'o ndo ma tu'un k̀titu'un ndi nuu ndo. Vati j̀a' ndi chi'in ndo takua j̀a' iin ra k̀u tatá chi'in se'e ra, ¹² vati endee j̀nini ndi ndo ña na ja'a ndo takua iyo yi ña ja'a ndo, ikan na koo va'a ndo kuenda Ndioo, ti rakan k̀u ra ña k̀chin ra ndo ña na koo ndo chi'in ra nuu ni nde'o naja kua ya'a ga ka'nu k̀u ra ma nuu

chà'nda ra tiñu.

¹³ Yakan va cha'a' ña'a kùu yi ña endee töve jãña ndi ña chà'a ndi ta'vindioo nuu ra cha'a' ndo, vati ndyo'o ora chīni ndo tu'un Ndioo ña kātitu'un ndi nuu ndo, ma ora ikani jāchi'in ndo yi chī'in ndisaa anima ndo, vati cha chito ndo ña yūvi tu'un yu'u ñivi kùu yi vati tu'un Ndioo kùu yi. Ta ndicha kuii ña ma tu'un Ndioo kùu ma ña jà'a ña koo ndo tiá vii nuu anima ndo, ikan na sii kuuni Ndioo ja'a ndo. ¹⁴ Ta ndisaa ndyo'o yani, ndian ìyo ñuu Tesalónica, indukuni tā'an ndo takua tā'an ma ñivi Ndioo, ndian chìnuni tu'un Jesucristu ña ìyo ñu'u' Judea. Vati ndyo'o indukuni ndē'e ndo tundo'o jā'a ma ndian töve chìnuni ìyo ñuu ndo, takua ndē'e ma ndian ñu'u' Judea tundo'o jà'a ma ndian judíu ìyo juuni ma ñuu na ndia. ¹⁵ Takan kūu ta ma ndian judíu ìyo juuni ma ñuu na, ndiakan kùu na ña chā'ni na Racha'nu Jesuu, ta juuni ndiakan kùu na ña chā'ni na ndra kà'an chī'in tu'un yu'u Ndioo chīyo taji'na ndia. Ta ikan jan jākunu na ndyu'u. Vati xaani na nde'e na ndisaa ñivi ta kànita'an na chī'in na ndia, va Ndioo töve chīsii ra ndè'e ra ma ña jà'a na. ¹⁶ Tatu kùuni ndi ka'an ndi chī'in ma ñivi yūvi judíu naja kua kuu jakakú Ndioo na, ta tüvi chà'a na ña na katitu'un ndi yi nuu na. Ta cha'a' yakan kùu yi ña tiaga ndòkua'a ma kuati na. Ta vitin ma ndiakan ndè'e na tundo'o, ti ya'a kàyuni ma Ndioo nde'e ra nuu na cha'a' ma ña töve va'a jà'a na.

Kātitu'un Paulu ña chànini ra kunde'e ra ñivi ìyo ñuu Tesalónica inga cha'a'

¹⁷ Ndyo'o yani, vaji takä'an nde'e ndiko ndi ndo nda ora kēsiin ndi chi'in ndo, va endee ñù'uni ndi ndo, ta ndisaa tiempu chànini ndi kunde'e ndiko ndi ndo ma ñuu ndo inga cha'a'. ¹⁸ Va taku yu'u Paulu nduva'a kuii kua'a' cha'a' chànini kunde'i ndo ñuu ndo niku, va ma kui'na chāsían' ma iti' ndi, yakan va nī kuu ku'un ndi kunde'e ndi ndo. ¹⁹ Va ndyu'u kùuni ndi ña na koto kachin ndo ña tandi'i ndyo'o ndian chìnuni kùu ma ndian jà'a ña sii kùuni ndi, ta tayi kùuni ndi ti tiin va'a ndo ma tu'un kātitu'un ndi nuu ndo. Ta cha'a' yakan kùu yi ña ya'a chisii ndi ndātu ndi ora ni kichaa ndiko ma Racha'nu Jesucristu chito'o yo. ²⁰ Vati ndicha kuii ña cha'a' ndyo'o kùu yi ña ya'a ga chisii ndi ta tayi kùuni ndi.

3

¹ Takan kūu ta tava nī kundeeni ndi ña ya'a chànini ndi cha'a' ndo, yakan va ndyu'u kāchin ndi ña va'a ga ña kīndoo ma'iin nia ndi ma ñuu Atenas, ² ta tāchi ndi ma ra yanio Timoteu nuu ndo, vati rakan jàkuu tiñu nuu Ndioo indukuni takua kùu ndi, vati juuni kātitu'un ra naja kua jākakú Cristu yo ndia. Ta cha'a' yakan kùu yi ña tāchi ndi ra, ikan na ku'va ra tundeeni ndo, ña na chinuni va'a ndo ma tu'un Ndioo, ³ ikan na jāña nī'iin ndo ma tundeeni Ndioo ña iyo chi'in ndo jà'a ma tundo'o ndè'e ndo. Vati ndyo'o cha chīto va'a ndo naja kua iyo yi ña nde'o tundo'o cha'a' ña chìnuni yo ma tu'un Cristu. ⁴ Vati ora chīyo ndi chi'in ndo juuni kātitu'un ndi nuu ndo ña ni nde'o tundo'o iti' nuu, ta ndicha kuii ña

takan kùu yi, ti takan cha ndè'e ndo yi vitin. ⁵ Ta tava nī kundleeni gai tiá kivi ña chàninì cha'a' ndo, yakan va tächì ma Timoteu nuu ndo, ikan na ku'va ra koto ndi tuva ndicha ña juuni chìnuni ga ndo tu'un Jesuu a tüva. Vati yu'u, ndasij niku ti tu janda'viña'a ma kui'na ndo ta ki'vi ndiko ndo jà'a ndo ma ña kini inga cha'a'. Ta tu takan kùu yi, tüvi nda kuenda kùu ma tiñu jà'a ndi chi'in ndo tuva takan.

⁶ Va tava vitin já kichaa ndiko Timoteu ña chānde'e ra ndo ma ñuu Tesalónica, ta kātitu'un ra nuu ndi naja kua chìnuni va'a ndo ma tu'un Jesuu, ta naja kùuni ndo nde'e ndo ta'an ndo, ta naja kua chàku'uni ndo ndi ta juuni naja kua ya'a ìyoni ndo nde'e ndo ndi, takua ìyoni ndi kunde'e ndi ndo ma nuu ìyo ndo ndia, ⁷ yakan va cha'a' ndisaa ma tuxaan ini ña tà'an ndi i'ya vaji ndè'e ndi kua'a' tundo'o. Ta ndetiñu kùu yi kuenda ndi, va vitin chīsii ndi ti chìto ndi ña chìnuni va'a ndo ma tu'un Jesuu. ⁸ Yakan va vitin cha tüva nakani ndi cha'a' ndo vati cha chìto ndi ña juuni ìyo ndaaga ndo itì' ma Racha'nu. ⁹ Yakan va ora kà'an ndi chi'in Ndioo juuni ya'a chà'a ndi ta'vindioo nuu ra cha'a' ndo, ti cha'a' ndo kùu yi ña ya'aga sii kùuni ndi nuu ma Racha'nu Ndioo. ¹⁰ Vati nduvi ta niñuu ora kà'an ndi chi'in ra cha'a' ndo, chikan ndi ñamani nuu ra ña na ku'va ra ku'un ndi kunde'e ndi ndo nuu ìyo ndo. Vati kùuni ndi katitu'un ndi nuu ndo ma tu'un ra ña kùmaniga koto ndo.

¹¹ Yakan va chìkan ndi nuu ma Racha'nu Ndioo ra kùu Tatá yo chi'in ma Racha'nu Jesuu, ña na tindee ra ndi, ikan na kuu ku'un ndi kunde'e ndiko ndi ndo inga cha'a'. ¹² Ta juuni na tindee

ma Racha'nu ndo, ikan na kuuniga ndo nde'e ndo ma ndian chìnuni chi'in ma ndian töve chìnuni, takua kùuni ndi nde'e ndi ndo ndia. ¹³ Ta ma Racha'nu Ndioo ra kùu Tatá yo, na ku'va ra tundeeni ra nuu ndo, ikan na koo ga ma kuati ndo nuu ra, ta kuu ndo ñivi va'a ta íi kuenda ra ora ni kichi ndiko ma Racha'nu Se'e ra Jesucristu, chi'in tandi'i ndian íi ña ni kichaa chi'in ra.

4

Racha'nu Ndioo ya'a chisii ra

¹ Yakan va vitin ndyo'o yani jàninini ndi ndo ta chikan ndi cha'a' ña kùu ndo ndian kuenda ma Racha'nu Jesuu ma kua jāna'a ndi nuu ndo niku, ña na koo ndo ma takua kùuni ra, ikan na sii kuuni ra cha'a' ndo. Chìto ndi ña takan ìyo ndo vitin, va jàninini ndi ndo ña na ja'a ndo yi tiá kua'a'.

² Vati ndisaa ndo cha chìto va'a ndo ma tu'un kàtitu'un ndi nuu ndo chi'in ndatu ña chā'a Racha'nu Jesuu nuu ndi, ³ vati ma Racha'nu Ndioo kùuni ra ña na kuu ndo ndian íi kuenda ra, ta töve kùuni ra ña kivi ndo chi'in ña'a yüvi ñasi'i ndo. ⁴ Ta na koto va'a ndo naja kua koo vii ta'ii'iin ndo chi'in ñasi'i ndo ta iñu'u koo ndo chi'in vi, ⁵ ta tüvi jà'a ndo ma ña chàta'ani ma kuñu ndo takua jà'a ma ñivi ña töve nàkoto Ndioo. ⁶ Ta juuni tüvi jànda'viña'a ndo ma meru ndo ta kivi ndo chi'in ñasi'i ndra, vati ma Racha'nu Ndioo nduva'a kuui jànde'e ra tundo'o ma ndian jà'a takan, takua cha kàtitu'un ndi nuu ndo niku. ⁷ Vati Ndioo kàchin ra yo ña na kuu yo ñivi íi kuenda ra, ta yüvi ndian jà'a kuati. ⁸ Yakan va nda ndian ni kuuni ña töve jàchi'in na ma tu'un i'ya, ìyo yi na koto na ña yüvi tu'un ñivini

kùu yi, vati tu'un Ndioo ra chà'a ma Tati Í ra nuu yo ña na koo yi chi'in yo kùu yi.

⁹ Takan kùu yakan va tüva chiniñu'u ndo ña tàa ndi nuu ndo naja kua koo ndo chi'in ma ñivi ta'an ndo, vati maa ma Ndioo kùu ra ña cha jāna'a ra nuu ndo naja kua ìyo yi ña kuuni ndo nde'e ndo ta'ii'in ta'an ndo, ¹⁰ ti ndicha kuu ña takan jà'a ndo chi'in ma ñivi ta'an yo ña ìyo ninii ka'nu ñu'u' Macedonia vitin. Va vitin ndyu'u jànini ndi ndo, ndyo'o yani, ña na kuuniga ndo nde'e ndo ma ndian ta'an ndo tiaga kua'a'. ¹¹ Yakan va na nanduku ndo kua kuu koo va'a ndo, ta ja'a ndo ma tiñu maa ndo. Ta na jatiñu ndo chi'in nda'a' ndo takua cha kätitu'un ndi ña ìyo yi ña ja'a ndo. ¹² Takan ìyo yi ña ja'a ndo, ikan na tiñu'u ma ñivi töve chìnuni tu'un Ndioo ndo, ikan na tüvi kùmani ni'iin nakuyi nuu ndo ndia.

Jesuu ni kichi ndiko ra inga cha'a'

¹³ Ndyo'o ndra yani, kùuni ndi ña na koto ndo naja kua ìyo ña ta'an chi'in ma ndian ndí ña chìnuni tu'un Jesuu, vati tüvi kùuni ndi ña na nda'vi kuuni ndo takua nda'vi kùuni ma ndian tüvi ch̀to tu ni koo va'a na chi'in Ndioo iti' nuu. ¹⁴ Vati takua cha ch̀to va'a yo ña Jesuu chí'í ra ta nātaku ndiko ra, juuni takan ìyo yi ña koto kachin yo ña ma Racha'nu Ndioo ni janataku ndiko ra tandi'i yo ndian ni kuvi ña chìnuni tu'un Jesuu ndia.

¹⁵ Takan kùu yakan va kätitu'un ndi takan nuu ndo takua jāna'a Racha'nu Jesuu ora kīchi ra. Ta ndisaa nda yo ìyo nditoga nda ma ora ni kichi ndiko ma Racha'nu, ji'na ma ndian ndí kùu ma

ndian ni ndaa nuu sukun chi'in ra kua maa yo. ¹⁶ Ora ni nuu ma Racha'nu Jesuu iti' andivi juuni ni kunio iin tati ña kànachaa ni'i va'a, ta ni ka'an ma tati ka'nuga ña jà'a tiñu nuu Ndioo, ta juuni ni kunio ma tati ma yutun tìvi ma Ndioo. Tajan ma ndian chī'í ña chìnuni tu'un Jesuu, ji'na kuii ga ndiakan kùu ma ndian ni nataku. ¹⁷ Ta ikan jan, yo ndian kīndoo ndito ma ñuñivi i'ya ni ndaa yo ta ku'un ndito yo nuu ka'iin ma ndian cha nātaku ma tichi viko ma nuu sukun, ta ndakan ni ndikita'an yo chi'in ma Racha'nu ma nuu tati. Ta takan ni ni'o nuu koo yo endeeni chi'in ra. ¹⁸ Yakan va na jandomani ta'ii'iin ndo ta'an ndo chi'in ma tu'un i'ya.

5

¹ Ndyo'o yani, va cha'a' ma kuiya a ma ora ni kuu yakan, tūvi chiniñu'u ndo ña na taa ndi naja ni kuu yi. ² Vati cha ch̀to va'a ndo ti tūvi ch̀to yo nda kivi ta nda ora ni kichi ma Racha'nu ti jana'inio ora ni kichaa ra. Ta ndicha ña takan kùu yi chi'in ma ndra su'u ndia, vati ndrakan k̀vi ndra ta su'u ndra iin ve'e ma ora jàna'ini na ka'iin na. ³ Vati iyo ma ñivi ni ka'an ña na koo va'a yo vati cha yā'a ma nuu ni nde'o tundo'o. Va tūvi ch̀to na ña ma kivi ikan ni koyo ma tundo'o ikan chata na ora jàna'ini na takua jàna'ini ma ñivi ña'a ora chà'nda yi tichi vi ña ni kàku se'e vi. Yakan va ma ora ikan, tūva ni ni'i na naja kua kuu kakú na. ⁴ Va taku ndyo'o yani ña tūvi jà'a ndo kuati takua jà'a ma ndian töve nàkoto Ndioo, ti iyo tu'va ndo ma ora ni kichaa ma

Racha'nu. Yakan va ora ni kichaa ma Racha'nu tüvi jàna'ini ndo takua jàna'ini ñivi ora kì'vi ma ndra su'u ve'e na. ⁵ Yakan va ndisaa yo ndian kùu ñivi Ndioo, cha jàndakuu Ndioo yo ña na kuu yo ndian va'a ña chàkunuu ora ndichin, ta tüvi kùu yo takua kùu ma ndian jà'a kuati chàkunuu ora chanikuaa. ⁶ Yakan va töve ìyo yi ña kuu yo takua kùu ma ndian töve chìnuni tu'un Ndioo ña tüvi chà'a na kuenda ma ña kùuni ra, va ìyo yi ña koo tu'va yo ta kuàndi'i yo. ⁷ Ta ndian kìxi, kìxi na ora naa, ta ndian chì'i ndixi, juuni chìní na ora naa ndia. ⁸ Yakan va taku maa yo ña kùu yo ñivi Ndioo, chàkunuu yo ora ndichini, vati ìyo yi ña koo tu'va yo ta kumio yo, takua jà'a ma ndra jandaru ña chàku'un ndra iin kamixa ña kuva'a chì'in kaa kuenda ña kùmi ndra ndra. Yakan va takan ìyo yi ña ja'a yo kuenda yo chì'in ma ña chìnunio tu'un Ndioo, ta chì'in ña kùunio nde'o inga ñivi. Ta juuni ìyo yi ña kuation va'a yo ma Racha'nu Jesuu, ikan na kuu ni'o ña jakakú ra yo ora janaa ra ma ñuñivi, takua jà'a ma jandaru ña chàkoso ndra iin tuxini kaa kuenda ña jakakú yi ndra. ⁹ Vati ma Ndioo tüvi nī cha'a' ra ña na nde'o tundo'o, ti kùuni ra jakakú ra yo nuu ma tundo'o cha'a' ma Racha'nu Jesucristu. ¹⁰ Vati ma Racha'nu Jesucristu chí'í ra cha'a' yo. Yakan va indukuni kùu yi tu kuvio a koo ndito yo, vati ni koo ndito yo chì'in ra endeeni. ¹¹ Yakan va na jandomani ndo ta'an ndo, ta na ku'va ndo tundeeni na takua cha kīcha'a ndo jà'a ndo yi vitin.

Paulu jàkuninaa ra ma ndian chìnuni tu'un Ndioo

¹² Ndyo'o yani jàninini ndi ndo ña tiñu'u ndo ma ndra jàna'a tu'un Ndioo ña ìyo tañu ndo, ti Ndioo kàchin ndra ña na jana'a ndra nuu ndo ta kumi ndra iti' kuà'an ndo. ¹³ Yakan va ìyo yi ña tiñu'u ndo ndra ta kuuni ndo nde'e ndo ndra cha'a' ma tiñu jà'a ndra. Ta juuni takan ìyo yi ña koo va'a ndo chi'in ta'an ndo ndia. ¹⁴ Takan kuu ta juuni kùuni ndi ña na ja'a tuku ndo inga tiñu ndia. Na jakuninaa ndo ma ndian suchan ña tüvi kùuni jatiñu. Ta na ku'va ndo tundeeni ma ndian töve sii kuuni chi'in ma ña chìnuni na ndia. Ta juuni na tindee ndo ma ndian kumani chìnuni va'a, ta ìyo yi ña kunda'vini ndo ndisaa ma ñivi. ¹⁵ Ta na ja'a ndo kuenda nuu ndo tuva ìyo iin ñivi ña xaani nde'e ndo, koto jà'a ndo chi'in na takan ndia. Vati na nanduku ndo ja'a ndo ma ña va'a chi'in ta'an ndo, ta chi'in tandi'i ñivi ìyo ñuñivi ndia.

¹⁶ Yakan va na sii kuuni ndo tandi'i kivi. ¹⁷ Ta koto jãña ndo ña kà'an ndo chi'in Ndioo. ¹⁸ Ta na ku'va ndo ta'vindioo nuu ra cha'a' ndisaa ma ña tà'an ndo, vati yakan kùu ma ña kùuni ra ña na ja'a ndyo'o ndian chìnuni tu'un Jesucristu.

¹⁹ Na ku'va ndo ña na ja'a ma Tati Í Ndioo ma ña kùuni ra tichi anima ndo. ²⁰ Ta juuni koto kuātu'un ndo ma tu'un jàna'a ma ndra kà'an chi'in tu'un yu'u Ndioo. ²¹ Ta na ki'in ndo kuenda ma ña jàna'a ndra, nde'o tu ndicha a ña va'a kùu yi a töve. Ta ikan jan kachin ndio ndo ma ña va'a jà'a ndo. ²² Ta juuni na jaña ndo ña jà'a ndo tandi'i nuu ña kini ndia.

²³ Ta juuni ma Ndioo, ra jà'a ña na koo va'a ndo, na ja'íí va'a ra ndo ta ja'a ra ña na koo va'a

ma anima ndo chi'in ndisaa ma kuñu ndo chi'in ma chinituni ndo ndia, ikan tüvi nata'an ra ndo chi'in kuati ndo ora ni kichaa ndiko ma Racha'nu Jesucristu, ra kùu chito'o yo. ²⁴ Vati ma Racha'nu ña kächin yo kùu iin ra ndicha ti jächinu ra ña kà'an ra.

Ma tu'un nuu ndi'inia ña kà'an Paulu nuu na
²⁵ Ndyo'o yani, na naka'an ndo Ndioo cha'a' ndi, ikan na tindee ra ndi ndia.

²⁶ Ta kunumindaa ta'an ndo ma ndian ta'an yo ña chìnuni tu'un Ndioo ora kaña'a ndo chi'in na.

²⁷ Ta juuni katitu'in nuu ndo kuenda ma Racha'nu chito'o yo ña ìyo yi ña jakua'a ndi'i ndo ma tutu i'ya nuu ma ndra yanio, ta ñivi ta'an yo ña chìnuni tu'un ra.

²⁸ Ta maa ma Racha'nu Jesucristu, na ja'íí ra ndo. Ta takan na kuu yi. Amén.

Zacatepec Mixtec NT
Mixteco, Santa María Zacatepec: Zacatepec Mixtec
NT New Testament

copyright © 2015 Wycliffe Bible Translators, Inc.

Language: Mixtec, Santa María Zacatepec

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 28 Sep 2022 from source
files dated 28 May 2022

55b3808f-9cd0-5da9-90f0-a96c172e0e02